



Ya Allah !! Limpahkanlah taufik dan hidayah, ilmu yang bermanfaat, rezeki yang diberkati, kesihatan yang sempurna, hidup dalam Islam dan mati dalam iman kepada kami dan kepada sesiapa yang terlibat dalam usaha penerbitan RISALAH ini. Amin ! Ya Rabbal Alamin !!

LIMA BELAS BUKTI KEIMANAN

Oleh: Ustaz Safwan Fathy (Penerima Anugerah Imam al-Ghazali Negeri Selangor)

Al-Hakim meriwayatkan Alqamah bin Haris RA berkata, aku datang kepada Rasulullah SAW dengan tujuh orang dari kaumku. Kemudian setelah kami beri salam dan beliau tertarik sehingga beliau bertanya, "Siapakah kamu ini?" Jawab kami, "Kami adalah orang beriman." Kemudian baginda bertanya, "Setiap perkataan ada buktinya, apakah bukti keimanan kamu?" Jawab kami, "Buktinya ada lima belas perkara. Lima perkara yang engkau perintahkan kepada kami, lima perkara yang diperintahkan oleh utusanmu kepada kami dan lima perkara yang kami terbiasakan sejak zaman jahiliyyah?"

Tanya Rasulullah SAW, "Apakah lima perkara yang aku perintahkan kepada kamu itu?" Jawab mereka, "Kamu telah perintahkan kami untuk beriman kepada Allah SWT, percaya kepada Malaikat-Nya, Kitab-kitab-Nya, Rasul-rasul-Nya, percaya kepada takdir Allah SWT yang baik mahupun yang buruk." Selanjutnya tanya Rasulullah SAW "Apakah lima perkara yang diperintahkan oleh para utusanku itu?" Jawab mereka, "Kami diperintahkan oleh para utusanmu untuk bersaksi bahawa tidak ada Tuhan selain Allah dan engkau adalah utusan Allah, hendaknya kami mendirikan solat wajib, mengerjakan puasa di bulan Ramadhan, menunaikan zakat dan berhaji bila mampu."

"Bersyukur di waktu senang, bersabar di waktu kesusahan, berani di waktu perang, redha pada waktu kena ujian dan tidak merasa gembira dengan sesuatu musibah yang menimpa pada musuh."

Tanya Rasulullah SAW selanjutnya, "Apakah lima perkara yang kamu masih terbiasakan sejak zaman jahiliyyah?" Jawab mereka, "Bersyukur di waktu senang, bersabar di waktu kesusahan, berani di waktu perang, redha pada waktu kena ujian dan tidak merasa gembira dengan sesuatu musibah yang menimpa pada musuh." Mendengar ucapan mereka yang amat menarik ini, maka Rasulullah SAW berkata, "Sungguh kamu ini termasuk di dalam kaum yang amat pandai sekali dalam agama mahupun dalam tatacara berbicara, hampir sahaja

kamu ini serupa dengan para Nabi dengan segala macam yang kamu katakan tadi."

Kemudian Rasulullah SAW selanjutnya, "Mahukah kamu aku tunjukkan kepada lima perkara amalan yang akan menyempurnakan dari yang kamu punyai?"

Janganlah kamu mengumpulkan sesuatu yang tidak akan kamu makan.

Janganlah kamu mendirikan rumah yang tidak akan kamu tempati.

Janganlah kamu berlumba-lumba dalam sesuatu yang bakal kamu tinggalkan,

Berusahalah untuk mencari bekal ke dalam akhirat."



FADILAT SOLAT JENAZAH

Soalan :

Apakah fadilatnya kepada jenazah jika dia telah disembahyangkan oleh lebih empat puluh orang?

Jawapan :

Ibnu Abbas r.a. berkata: "Aku mendengar Rasulullah s.a.w. bersabda: Orang Islam yang mati, lalu disembahyangkan jenazahnya oleh empat puluh orang yang tidak musyrik, nescaya Allah memberi mereka syafaat padanya." (Riwayat Ahmad dan Muslim).

Daripada Malik bin Hubairah pula, ujarnya, "Rasulullah s.a.w. telah bersabda: Orang Mukmin yang mati, lalu disembahyangkan oleh segolongan kaum Muslimin, yang terdiri daripada tiga saf, nescaya dia diampun dosanya." (Riwayat lima ahli hadis selain al-Nasai).

Soalan :

Adakah wajib diasingkan tempat tidur dua orang saudara kembar yang berlainan jantina (jelasnya seorang lelaki dan seorang perempuan) mengikut hukum Islam?

Jawapan :

Ya, wajib diasingkan tempat tidur mereka setelah masing-masing mengetahui rahsia kejantinaanya, khususnya setelah mencapai peringkat baligh. Pengasingan tempat tidur itu sama saja bagi anak-anak yang kembar atau tidak kembar, bahkan di antara anak perempuan dengan bapanya dan anak lelaki dengan ibunya. (Sila rujuk Surah al-Nur: 58 dan 59).

Soalan :

Sepasang suami isteri telah berkelahi pada waktu siang. Kemudian pada waktu malamnya si suami telah mengigau dengan

melafazkan perkataan cerai terhadap isterinya. Si isteri yang ada di sisinya mendengar perkataan itu. Adakah perkataan suami itu boleh diiktiraf sehingga menyebabkan gugur talak kepada isterinya?

Jawapan :

Perkataan suami itu tidak diiktiraf, kerana dia di dalam keadaan tidak sedar sewaktu melafazkannya. Oleh itu talak tidak gugur. Sabda Rasulullah s.a.w. maksudnya: "Terlepas daripada catatan (hukuman) ke atas tiga orang, iaitu kanak-kanak sehingga dia baligh, orang yang tidur sehingga dia terjaga (sedar) daripada tidurnya dan orang gila sehingga dia sembuh (siuman)." (Riwayat Abu Daud dan Ibnu Majah).

Soalan :

Seorang sahabat saya berada di dalam keadaan gelisah kerana telah terhisap air susu isterinya dan dia menyangka isterinya itu telah bertukar menjadi ibu susu. Benarkah yang demikian?

Jawapan :

Isteri sahabat anda itu masih sebagai isterinya sekalipun sahabat anda telah terhisap air susunya, kerana salah satu syarat menjadi ibu susu si penghisap mestilah kanak-kanak yang berumur kurang daripada dua tahun.

Soalan :

Apakah hukumnya seorang lelaki memakai rantai emas kerana arahan di dalam mimpi daripada datuknya yang telah meninggal dunia?

Jawapan :

Adapun memakai rantai emas bagi lelaki sama ada kerana mematuhi arahan mimpi atau tidak, hukumnya haram. Mimpi sedemikian tidak wajib dipatuhi.



Soalan :

Adakah diharuskan seorang wanita meminang lelaki mengikut pandangan Islam?

Jawapan :

Ya, seorang wanita harus meminang seorang lelaki kerana tiada nas yang melarang demikian. Bagaimanapun, pembayaran mahar atau maskahwin adalah tetap wajib ke atas lelaki, tidak diwajibkan ke atas perempuan.

**HARGA DARI
RM4990**

**TERAM TRAVEL
SHAH ALAM**

Lot 1-23 Bangunan Anggerik Mall
Sek 14 Shah Alam. **03-55183350**

Penerbangan terus ke Jeddah.
Buku Panduan serta kursus Umrah
Percuma.
Mutawif disediakan dari Malaysia

Mencontohi Kepimpinan Rasulullah SAW

B Dalam menghayati sirah atau sejarah hidup Rasulullah SAW, salah satu daripadanya adalah tentang kepimpinan Baginda SAW yang unggul. Kepimpinan di dalam rumah tangga, di masjid, sebagai ketua Negara, ketua angkatan perang dan sebagainya.

Jarang ada pemimpin yang dapat menguasai pelbagai bidang. Ada pemimpin yang begitu masyhur dalam sebuah negara, tetapi rumah tangganya kucar-kacir.

Ada pemimpin Berjaya mengumpulkan kekayaan untuk kepentingan keluarga dan kaum kerabatnya, tetapi kurang prihatin terhadap kebajikan rakyat. Ada pula pemimpin yang berjaya memakmurkan sebuah masjid, tetapi malangnya dia tidak mengambil berat hal ehwal masyarakat di sekelilingnya.

Yang lebih malang ada pula pemimpin berwibawa dan berpotensi besar untuk memajukan ummah dan negara, tetapi lemah dalam memimpin diri sendiri sehingga terlibat dengan rasuah, skandal dan sebagainya.

Di manakah rahsia peribadi Rasulullah SAW sehingga layak menjadi pemimpin agung dalam berbagai-bagai bidang?

Sesungguhnya Nabi Muhammad SAW ialah manusia utama yang diutus oleh Allah SWT dan tidak ada seorang pun yang dapat menyamai kedudukan Baginda SAW, jauh sekali untuk mengatasinya.

Bagaimanapun, kita sebagai pengikut Nabi Muhammad SAW, maka harus berusaha sedaya upaya untuk mencontohi sirah atau perjalanan hidup Baginda SAW sebaik mungkin. Demikian juga rakaman pengajaran Islam menerusi Al-Quran sebagai sumber kekuatan peribadi dan

kepimpinan Nabi Muhammad SAW serta perlunya kita mempelajari al-Sunah kerana ia adalah gambaran yang jelas tentang peri hidup dan corak kepimpinan Rasulullah SAW.

Berikut adalah antara ciri terpenting yang mengangkat Nabi Muhammad SAW sehingga berjaya muncul sebagai pemimpin agung dan berwibawa yang harus menjadi iktibar dan pengajaran kepada kita:

· Nabi Muhammad SAW memperoleh sumber kekuatan jiwa menerusi ilmu, iman dan takwa daripada Allah. Pada peringkat awal, Baginda SAW disuruh oleh Allah agar

Ada pemimpin yang begitu masyhur dalam sebuah negara, tetapi rumah tangganya kucar-kacir

merenung dan memikirkan alam ciptaan Tuhan yang terbentang luas seperti langit, bumi, matahari, bulan, bintang, peredaran siang dan malam, tumbuh-tumbuhan, haiwan ternakan dan haiwan yang melata di muka bumi.

(Sila rujuk: Surah al-Syams: 1-6, Surah al-Ghasyiah: 17-19).

Kemudian, Baginda SAW mendapat wahyu pimpinan Ilahi yang berterusan sejak zaman Makkah dan seterusnya zaman Madinah, yang meliputi aspek akidah dan syariah yang syumul atau menyeluruh. Rasulullah SAW juga membina kekuatan rohani melalui solat fardu lima waktu dan ditambah dengan solat malam (Tahajud), zikir dan doa yang berterusan siang dan malam.

· Rasulullah SAW membersihkan diri daripada segala kekotoran zahir dan batin sehingga kehidupan Baginda SAW amat indah sekali. Baginda SAW bersih daripada hasad dengki dan dendam, tidak sombong, tidak mementingkan diri sendiri, malah bersih daripada sifat negatif yang lain.

· Rasulullah SAW bersifat pengasih dan penyayang, suka menolong orang yang susah seperti anak yatim dan fakir miskin.

· Rasulullah SAW bersifat sidiq (benar, tidak berdusta), apa jua yang dituturkan maka itulah juga yang ada di dalam hatinya.

· Rasulullah SAW bersifat amanah, sebab itulah segala tanggungjawab yang dibebankan kepadanya dilaksanakan dengan sebaik-baiknya.

· Nabi SAW bersifat tabligh, yakni menyampaikan segala pengajaran yang diterima daripada Allah kepada umatnya dengan tujuan mendidik mereka ke jalan kebenaran.

· Rasulullah SAW memiliki sifat fatonah (kebijaksanaan) dalam mengurus, mentadbir atau mengambil sesuatu tindakan.

· Rasulullah SAW bersifat adil, dalam melayani dan memimpin umatnya, tanpa memilih bulu atau bersikap berat sebelah, sehingga Nabi SAW pernah bersabda: "Kalau anakku Fatimah mencuri, pasti aku potong tangannya."

· Nabi Muhammad SAW berjaya membentuk keluarga dengan penuh harmoni, kerana Baginda SAW amat prihatin dalam mendidik dan memimpin isteri, anak dan cucu dengan penuh kasih sayang.



NIKMAT dan UJIAN

Rasulullah SAW bersabda yang bermaksud: "Sesungguhnya bagi setiap umat itu mempunyai ujian dan ujian bagi umatku adalah harta kekayaan." - Riwayat at-Tirmidzi

Huraian

1. Harta kekayaan, kemewahan dan pangkat menyilaukan pandangan serta dapat mengubah pendirian seseorang.
2. Islam melarang umatnya bersikap terlalu mementingkan kehidupan dunia dan mengutamakan kehidupan peribadi lebih daripada kepentingan masyarakat. Sedangkan pemberian atau nikmat-nikmat keduniaan itu sebenarnya adalah suatu bentuk ujian daripada Allah SWT untuk mengukur sama ada manusia menghargainya dengan bersyukur atau tenggelam dalam kekejaan hingga menjadi kufur terhadap Allah SWT.
3. Oleh itu setiap individu perlu berwaspada agar tidak menjadikan harta kekayaan sebagai alasan untuk melupakan perintah dan suruhan Allah SWT sebaliknya menjadikan nikmat-nikmat tersebut sebagai faktor pendorong untuk melakukan kebajikan dan amal soleh yang dituntut dengan ikhlas bersungguh-sungguh kerana

...nikmat-nikmat keduniaan itu sebenarnya adalah suatu bentuk ujian daripada Allah SWT

golongan seperti ini bukan sahaja akan beruntung di dunia bahkan mendapat ganjaran besar yang di akhirat kelak.

Rasulullah SAW. Bersabda yang bermaksud: "*Sesiapa yang mempunyai kenderaan yang melebihi dari keperluannya sendiri hendaklah bersedekah kepada orang yang tidak mempunyai kenderaan dan sesiapa yang mempunyai lebih bekalan makanan hendaklah ia bersedekah kepada orang yang tidak mempunyai apa-apa bekalan makanan. Selanjutnya baginda menyebut bermacam-macam lagi harta benda yang baginda teringat hingga kami lihat bahawasanya tidak ada seorang pun dari kami yang benar-benar mempunyai kelebihan*"
Hadith Riwayat Muslim



Huraian

1. Islam menggalakkan umatnya supaya memberi pertolongan dan bantuan kepada orang-orang yang susah dan orang-orang yang memerlukan bantuan samaada dari segi harta benda, kewangan dan sebagainya.
2. Hikmah bersedekah ialah untuk mengelakkan daripada mementingkan diri sendiri sebaliknya mengeratkan persaudaraan didalam Islam.
3. Bagi golongan yang kaya yang mempunyai harta kekayaan yang banyak digalakkan bersedekah dengan memberi bantuan makanan kepada golongan yang amat memerlukan, bantuan basikal untuk kanak-kanak kesekolah atau apa-apa sumbangan yang diperlukan bagi mereka yang amat memerlukan.

KESABARAN SEORANG PEREMPUAN YANG DIRASUK

Ata' bin Abi rabah berkata, Ibnu Abbas r.a telah bertanya kepadanya, "Mahukah aku tunjukkan kepada engkau seorang perempuan ahli syurga?" Jawab Ata, "Bahkan, siapakah perempuan itu?" Ibnu Abbas berkata, "Perempuan hitam itu telah menemui Rasulullah SAW mengadu ia telah dirasuk." Sabda Rasulullah SAW

kepada perempuan itu, "*Jika engkau tahan dan sanggup bersabar maka syurga bagimu, sekiranya engkau tidak tahan dan tidak sanggup bersabar aku akan mendoakan engkau supaya engkau pulih segar.*"

Jawab perempuan itu, "Aku tahan dan sanggup bersabar (maka baginya

syurga)" Sekian tercatat dalam kitab sahih Bukhari dan Muslim. Dari sini dapatlah kita satu keterangan, bahawa penyakit sarak atau rasukan bukanlah ia sesuatu yang baru tetapi telah diketahui sejak zaman berzaman dan zaman Nabi dan sahabat.